



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 7

**Japan nunger asayar Shinji Okazaki asaya nungi anentsü**

**Russia-i amak tenziker sepai 31,000 süogo: Zelensky**

VOL. XXI ISSUE NO. 135 (ADOK 135) DIMAPUR SANGTENNÜ (TUESDAY) TSÜKLAI (FEBRUARY) 27, 2024 ₹ 5.00

## Advisor Dr. Kekhrie Yhome-i tatok meshir AKM & SKK-I LUNGKAK AITTSÜ ALIBA ATHIR

**Dimapur, February 26, 2024 (TYO):** School Education aser SCERT Advisor Dr. Kekhrie Yhome-i February 6 aser 16, 2024 anogotem jembiba onük asoshi tatok meshiogo.

Ni jembiba olen ajanga Ao aser Sumi kintem temulung yirutsüogo aser iba ajanga terata adokdaksüogo, ta Dr. Kekhrie-i Hombarnü ashi.

"Ni tanguptüpur nem mapa magütsüsü tebilemba kecha mali aser ni jembiba onük janga temulung yiruja lir tatok meshir. Kati ka aria bilemtsü aser tangatettep nung alitsü mepishir" ta Advisor-isa metetdaksü.

Iba nung ajemdaker Ao Students' Conference (AKM) aser All Sumi Students' Union (SKK)-i asüng (February 27, 2024) nungi lungkak aitba sentong tenzüksü aliba athir ta metetdaksüogo.

School Education/SCERT Advisor Dr. Kekhrie Yhome-i tatok meshiba shidi den sorkar telangzüba ajak asadangba sülen onoki asüng nungi sorkar office, school aser college ajak shibangtsü sentong renemba athir, ta AKM o SKK ajanga metetdaksü.

"Advisor-i tatok meshiba atema tenüngsang agütsür aser asen dak sendakba onüktem olemtep aser tajungleni angatetteptsü ashiba agizüker" ta AKM President Lanutoshi Aier aser SKK President Gihuka K Zhimo nati ashi.

Mokokchung aser Zunheboto District tem nung aliba sorkar office, reju, school aser college ajak akhi ama lapoktsü. Sendaktepa alir ajaki kati ka akhümtsübu aser angatettepa asen loktiliba tejakleni anir aotsü ayongzüker ta tenatisa metetdaksü.

## ENPO-i election kecha nunga shilem magitsü

**Dimapur, February 26, 2024 (TYO):** Eastern Nagaland Peoples' Organization (ENPO)-i central aser state elections nung shilem magitsü lemtetogo.

India sorkar dang 'Frontier Nagaland Territory' (FNT) tentettsü takhangba agütsüba asoshi lemtet ka magi tashi election kecha nunga shilem magitsü ta ENPO-i metetdaksü.

Mon district kübok Chenmoho yimtsüng nung February 23, 2024 nü senden ka amendang iba lemtet agi.

February 9, 2024 nü Eastern Nagaland kübok district 7 aser ADC headquarters ajak nung nübortemi sentongtem ayonga agiba sülen ENPO-i iba lemtet agiogo.

2023 Assembly elections matongdang parnoki bangjemtepba ama ENPO-i "Frontier Nagaland" ta ser state balala tentettsü akhangba asoshi mapa meinyak tashi state aser central election kecha nunga shilem magitsü metetdaksüogo.

## Toiho Yeptho-i Deputy Speaker inyaksü

**Kohima, February 26, 2024 (TYO):** 14 buba Nagaland Legislative Assembly (NLA) nung Deputy Speaker inyaksü atema Nationalist Congress Party (NCP) MLA S. Toiho Yeptho shimogo.

Arishi küm 50 tain Toiho Yeptho ya tang mezüng atema MLA ka lir aser taoba state assembly elections nung pai taoba Tourism Advisor aser BJP candidate H. Khehovi madak takok ngua liasü.

2024-25 atema Budget session mezüng anogo nung election agitsü aser NCP MLA Yeptho-i dang tenüng agütsü ta NLA Speaker Sharingain Longkumer-i metetdaksü.

Yeptho ya State Assembly nung MLA tasen ka süaka pai public wadang balala nung inyaka aruogo. Pai kaketshir telok balala nung lennir inyak aser Village Council - Khekiya nunga Chairman inyakogo ta CM Rio-i Deputy Speaker nem tenüngsang agüja jembidang ashi.

NLA Speaker Sharingain

Longkumer kübok Yeptho-i mapa tasen angazüksü aser Deputy Speaker tajung ka ama inyaka aotsü imlar ta pai ashi.

Toiho Yeptho-ia o jembidang Chief Minister Rio aser MLA temi pa shimtetba atema pelaba metetdaksü.

Sorkar ketdangsubaren junga memetet aser assembly nung tasenpur ka lir anungji Speaker aser züngsemtem teyari nungdaker, ta paisa ashi.

"Iba Assembly akhümket wazüka ni nendaka aser indangindanga kü nem lezmüksüba mapa inyaksü" ta Toiho Yeptho-i ashi.

NDPP-BJP nati aniba Peoples' Democratic Alliance sorkar nung ta political party tem nungi MLA 23 rongnungi mezüng mapa anguba MLA ji Yeptho lir.

NDPP-BJP PDA sorkar pusemertemji NCP nungi MLA 7, NPP nungi 5, LJP (Ram Vilas), Naga People's Front (NPF) o RPI (Athawale) nungi anana, JD(U) 1 aser Independent 4 lir.

## Centre den Indo-Myanmar arrtsü tebilemtsü lemsatepogo: La. Ganesan



February 26, 2024 nungi 14 buba Nagaland Legislative Assembly indang session pezübuba tenzuka agiba noksa nung angur.

**Kohima, February 26, 2024 (TYO):** State sorkari Centre dang Indo-Myanmar arrtsü atsüdagtsüba lemtet meyipa reprangshitsü aser Free Movement Regime (FMR) magientsü mepishiogo ta Nagaland Governor La. Ganesan-i ashi.

"Naga putiotsü reprangdangra arrtsü adena orr alirtem den kibong ka agi sosemtepa lir. Tesem aika nung ali kiburtemji international boundaries adena orr lir anungji onoki Centre dang lemtet meyipa reprangshitsü aser FMR maneni alitsü mepishiogo" ta Ganesan-i ashi.

"Onokisa FMR tiptema inyaksü atema Village Council Authorities anioktsü asüngdangogo" ta pai ashi.

"State sorkari Naga yimten tebilemtsü atema kanga süoki ia bilemer. Tesüba küm aika Nagaland nung alirtemi Naga yimten latettsü aser tensa süngjema alitsü aginüa arur. Nagaland nung alir ajak tenüng nung ni iba ken o dak sendaktepa alir ajak dang tetsükdaksü aser mangatettep amadoker tatembang lemtet ka agitsü ayongzüker" ta Governor Ganesan-isa ashi.

Nagaland nung jilatem renloktsü atema Nagaland Municipal Act, 2023 agizükogo aser sorkari tekaraba nung Urban Local Bodies elections agitsü

mapa inyakba atema pelar, ta La. Ganesan-isa ashi.

Department of School Education-i education management information systems (EMIS) akangshitsü, teacher attendance monitoring system (TAMS) tenzüksü aser adult learners atema professional learning communities (PLCs) tentettsü mapa inyaker, ta pai ashi.

State sorkari school complexes 16 yanglutsü aser iba dang Lighthouse School Complexes ta ajatsü, ta Governor-isa ashi.

Nagaland nung Higher Education atema sorkari Centre den Indian Institute of Science Education & Research (IISER) ka lapoktsü atema mapa inyaka arudar, ta paisa shisem.

"IISER ama reju ka ajanga Nagaland nung national institute ka angutsü aser iba ajanga science, maths education aser research ajungkettsü. IISER lapoktsü atema sorkari Sukhovi, Chumoukedima district nung ali acre 200 aliogo" ta Governor Ganesan-isa ashi.

Nagaland nungi saisapongertemi national aser international levels nung shilem agiba aser medals anguba atema sorkar nüma atanger ta pai ashi.

Nagaland nung Veterinary Health Services tashitaitba akümtsü atema Department-i

Tseminyu district aser Mokokchung district kübok Mangkolemba nung Veterinary Hospital ana lapoktsü. Iba ya NABARD ajanga inyaker maparen tatemleni arur ta paisa metetdaksü.

Rural Development-i RD Blocks 74 kübok yimtsüng 1260 nung community-led poverty reduction programme ka inyaker. Iba ya Deendayal Antyodaya Yojana-National Rural Livelihood Mission (DAY-NRLM) kübok Nagaland State Rural Livelihoods Mission (NSRLM) ajanga inyaker.

Iba programme nung Self Help Groups ajanga yimtsüng nung alir kilen 1.24 lakh shi ajangzükogo, ta Governor-i ashi.

Department of Environment, Forest and Climate Change ajanga Nagaland nung forest cover ulushiogo. Parnoki 24,000 hectares tashi afforestation kübok dendaksüogo aser JICA Assisted Nagaland Forest Management Project (NFMP) ajanga süngdong lakh 55 tema temogo.

Kümtem süia arudang Nagaland State GST teimba bendena arur aser iba ajanga sorkar tax collection maparen tajungba inyakba sayur. Tan financial year nung GST alizüngji Rs 1397.94 crore lir aser December 2023 tashi nung sorkari Rs 995.35 crore bendenogo, ta Ganesan-i ashi.

## MLA ajanga Eastern Nagaland atema draft 'MoS' agütsü: CM Rio

**Kohima, February 26, 2024 (TYO):** Eastern Nagaland atema draft 'Memorandum of Settlement' (MoS) agütsüba Ministry of Home Affairs (MHA) nungi lir ta Nagaland Chief Minister Neiphiu Rio-i Hombamü ashi.

"Union Home Ministry ajanga MoS bener yok aser ni ENPO MLA tem aser ketdangpurtem den jembitsü atema Union Home Minister Amit Shah-i kü nem agütsü" ta Rio-i osangbener dang ashi.

"Eastern Nagaland MLA tem

asir ENPO senden ka menogo saka tang onük ana jembir. Eastern Nagaland MLA temibo senden nung adener ajaki draft proposal ji teka makanga magizüksü lemtet ta ashir saka ENPO-ibo Ministry nungi parnok dangi draft maru ta ashir" ta Rio-i ashi.

"Iba terata ya parnok sasep nung lir. State cabinet-ibo ENPO aser Eastern Nagaland MLA tem tsüngda iba atema senden ka amentsü lemtetogo. Iba ya tashi lemsateptsüba atema teimba lira ser parnoki agizük mesüra

magizük nunga onoki MHA dangi osang abentsü" ta pai ashi.

"ENPO-i Centre den indangindanga asüngdangnura onoki ashishitep kecha mali saka onok nem mapa lezmüksüba ama inyakogo. Parnoki MHA den indangindanga jembir anungji parnoki asüngdangtsü akok" ta CM Rio-isa shisem.

Centre Indo-Myanmar arrtsülen Free Movement Regime agientsü lemtetba atema MLA tem jembitsü Chief Minister Rio-isa ashi.

# Nagaland atema Financial Literacy Week 2024 tenzükogo



General Manager & Officer-in-Charge RBI Kohima Paresh Chauhan ajanga February 26, 2024 nü Hotel de Oriental Grand, Kohima nung Nagaland atema Reserve Bank of India indang Financial Literacy Week 2024 tenzüksü.

**Dimapur, Tsüklai/February 26 (TYO):** Nagaland asoshi Reserve Bank of India indang Financial Literacy Week 2024 sentong Hotel de Oriental Grand, Kohima nung February 26, 2024 nü Paresh Chauhan, General Manager & Officer-in-Charge ajanga semzükja liasü.

Iba sentong nung CGM & O-i-C, NABARD, Nagaland RO, DGM, SBI, Jorhat, Regional Manager, CRISIL, Guwahati, Kohima nung aliba bank tem indang Branch Manager tem, Mt. Olive College aser Vinuozo School, Kohima indang principals, tesayur aser kaketshirtem dena liasü.

Financial Literacy indang angatetdaksütsü mechi Reserve Bank ajanga 2016 küm nungi küm shia hopta ka-ka Financial Literacy Week ayongzükja arur.

Kaketshir aser lanurtem tarutsü nung senotsü tsütsü pei kibur süa junga ketdang asütsü

asoshi tashi agütsütsü nükjidong nung taküm Financial Literacy Week indang omen ya "Make a Right Start: Become Financially Smart" yanglu.

Iba omen kübok awareness programme tem ya sub-themes asem nung rangloker agitsü, koba senotsü dak sendakba nung telemtetba agiba aser senotsü amshiyim nung kanga tongtipang lir.

Mezüngbuba ya 'Saving and Power of Compounding' alitsü aser ibai sen terara süaka maneni bendenba nung 'compounding interest' ajanga sen ainba indang angatetdaksütsü nükjidong nung lir.

Tanabuba ya 'Banking Essentials for Students' alitsü aser ibai tanurtem atema bank account lapoktsüba asoshi awareness agütsüba aser sen lakh pezü tashi collateral free education loans indang lir.

Tasembuba ya 'Digital and

Cyber Hygiene', aser ibai digital transactions mapang kumdanga alitsü nüngdakba indang lir.

Financial Literacy Week nung shilem ka ama bank tem dang item omen nung ajemdaker nüburtem aser customer nem awareness agütsütsü aser osang prokshitsü ashi.

Maneni RBI ajanga yangluba content tem pei websites, ATMs, mobile applications aser pei branch nung aliba digital display boards nung sayutsü ashi.

Shimteta aliba omen nung ajemdaker RBI ajanga centralized mass media campaign ayongzüksü.

RBI Kohima ajanga kaketshir aser lanurtem dak rangloker outreach sentong balala yanglua lir aser lokti tentet balala dang Financial Literacy Week 2024 ya akok tashi nüburtem tsüngta prokshitsü ayongzükja liasü.

# Nagaland Judges' Association lokti senden amen



**Dimapur, Tsüklai/February 26 (TYO):** Nagaland Judges' Association pur 20 buba lokti senden De Oriental Grand, Kohima nung February 24, 2024 nü mena liasü.

Iba sentong nung alakteta jaoker Justice Devashis Baruah, Judge, Gauhati High Court aser tetushi tesemdanger Advisor, Law & Justice and Land Revenue, Government of Nagaland, T.N. Mannen liasü.

Iba sentong nung Justice Devashi Baruah-i pa obendangba wadang nung tetsüng ajemokba aser obendanger ka ama taziökba

alitsü indang jembia liasü. Pai Assam nung civil laws indang jembi aser Kohima nung mapang tatsüka aliba bilemteta jembia liasü.

Paisa obendanger tem dang Constitution of India aser nübur dak tajemba kongshitsüsa state-i mera agitsü indang lemsatsep.

Advisor T.N. Mannen-i iba sentong nung o tatsüka jembidang tim yimya nung obendang agütsütsü aser customary law meyipzükja amshiba aser Naga nungeri itemji tim yimya nung amshitsü nüngdakba indang lemsatsep.

Paisa mapang shidak nung


obendang agütsütsü ayongzükja liasü.

Y. Longkumer-i tashi nung pei teinyaktsü keta aliba indang lemsatsep aser obendanger tem dang ochishia alitsü, ochi nung nokdaka mapa inyaktsü aser nüburtemi obendanger dak tamang katettsüsa alitsü indang jembia liasü.

Iba sentong nung menden ya Victo Sema, NJS, Member Secretary, NSLSA, President NJA liasü aser Kumdilong Kessen, NJS, Chief Judicial Magistrate cum Civil Judge (Sr.) Division, Longleng, Asst. General Secretary, NJA ajanga melepzüng o jembia liasü.

# MULUNGNEN O

"Ni rara tajungji raraogo, ni alizüng tonga asemogo, ni tamangji yuogo." ~ 2 Timoti 4:7



Aso: 03. 03. 1927 Asü: 20. 02. 2024

Ozüi teti meima alila Asür Rev. Dr. L. Noksangchila mapang tatsüka shiranger asüba mapang sarasadem, nübu aser rongsen agi ozü den yaritepba asoshi kija, kibong, arogo, lokti tentet balala dang kinunger temi pelaba lemsatsep. Nenoki masetshi yariba ajanga onok tammang tia nung lia anisüngzük tulu nguogo.

Nenok kija shia tenüng tetshia pelaba meshitetba atema sasa bilemer. Ajisüaka Tulusang Tsüngremi nenok ajak mulamushia moatsütsü ozü sarasadem.

### Item dang mejeta pelaba lemsatsep:

1. Yaongyimsen Baptist Church
2. ABAM, Impur
3. Riongsanger Tatar Yaongyimsen
4. Sama Riju Yaongyimsen
5. Chumukedima Ao Baptist Church
6. Kohima Ao Baptist Church
7. CISHR 4th mile
8. Chumukedima Yaongyimsen Senso Union
9. Chumukedima Yaongyimsen Fellowship
10. Dimapur Yaongyimsen Senso Union
11. Dimapur Yaongyimsen Fellowship
12. Dimapur Yaongyimsen Tetsur Telongjem
13. Yaongyimsen Tetsur Telongjem
14. Chiten Semchir Telongjem Dimapur
15. Ao Arogo Associate Pastor Women
16. Dr & Mrs Sedevi, CISHR
17. Mr & Mrs Sentiyanger Rtd. IAS
18. Mr & Mrs Imtiyanger, Yaongyimsen
19. Mr & Mrs Metongba, Chungtia
20. Mr & Mrs Sosang, Salulemang
21. Late Pangersowa's children
22. Mr & Mrs Tiachuba, Akhoya
23. Mr & Mrs Limatoshi

- Temeim kinungertem

# Mkg. nung Toyota gari ayokba dokan ka lapok

Mokokchung nung tanu Okusa Toyota ta sür gari ayokba dokan ka lapoker kelen Okusa Toyota, Nagaland CEO N.Hokugha Yeptho(achichi) aser Mokokchung DC Thsüvisie Phoiji(abelen) külemi noksa nung angur.



**Mokokchung, February/ Tsüklai 26(TYO):** Mokokchung nung tanu Okusa Toyota ta sür gari ayokba dokan ka lapokogo.

Tanu iba gari ayokba dokan Okusa Toyota, Nagaland Managing Director Y.Vikheho Swu aruagi sentong meraketja lapoktsütsüba liasü, saka pa melena Okusa Toyota, Nagaland CEO N.Hokugha Yeptho aruagi Y.Vikheho Swu-i zülua yokba osang telok den zünga lemsatapa liasü.

Iba Okusa Toyota dokan nungya Toyota gari tasen ayoktsü aser ano nüburtemi teyari aginera parnoki Toyota gari lijaliyongtsü asoshi lenmang ajak nung yaritsü, talisa iba dokan nungi shirnokisa Toyota gari alidir parnok talirtem dang Mokokchung tashi gari bener arutsüba taah magii angati dang

bener arutsütsü. Anepdang 9:00 ako nung nikonngang 5:00 ako tashi iba dokan lapoktsüta Toyota achayanger ajangasa metetdaksüogo.

Tanu lapokba Okusa Toyota dokan ya Süngkomen Ward,Mokokchung nung Fire Station anasa lir. Anepdang 9:00 ako nung nikonngang 5:00 ako tashi iba dokan lapoktsüta Toyota achayanger ajangasa metetdaksüogo.

Tanu iba dokan lapokba sentong tatsüka agiba nung Mokokchung Deputy Commissioner Thsüvisie Phoji,Süngkomen ward yimden aser nübur aika aden, iba sentong agiba nung Süngkomen Baptist Arogo nung Asst.Pastor Matsüng Longkumer-i iba dokan asoshi Tsüngrem tang temoatsü meshia sarasadema tenzük.

# Ozü sorkar kümsük tasembuba June ita nungi tenzüksü: PM Modi

New Delhi, February 26 (Agencies): Hombarnü Ato kilonser Narendra Modi-i, Lok Sabha election agiba sülen BJP-i aniba sorkar kümsük tasembuba June ita nungi tenzüksü, ta ashi.

Tawa linük tesem balala nung sorkari terenlok project balala tenzüksüba metetdakja Modi-i, "Ozü sorkar kümsük tasembuba June ita nungi tenzüksü. Kanga kera terenlok mapa inyakba ajanga nürburtem süngmangteper," ta metetdaksü.

Sen crore 41,000 dak tema indang railway infrastructure project 2,000 semzüksüba sentong nung jembidang Modi-i, Vande Bharat trains tenzüksüba densema tesüiba

küm 10 tsüingda India tasenba yangerba nürburtemi nguogo, ta ashi.

Tan ita tetenzüklen Modi-i, taruba Lok Sabha election nung BJP-i menden 370 nung takok angutsü aser NDA teloktepi menden 400 dak tema angutsü, ta metetdakja liasü.

Modi-isa, sorkar kümsük tasembuba nung tongtibang telemteba aika agitsü aser taruba küm 1,000 atema tamendakdak yanglutsü, ta metetdaksü.

"Linük nürburtem tebilemba ni meteter. Nürburtemi taruba Lok Sabha election nung NDA nem menden 400 dak tema agütsü aser BJP nem tajemba agi menden 370 agütsü. Tesüiba küm 10

yimsüsüba mapang ajangshiba, tanü linük rongsenkettzüng tashi aitba aser tanü India kanga kera renlokba nung ajemdaker ni ya temelung lema shiteter- özü sorkar kümsük tasembuba nung India ya alima nung rongsenkettzüng tulutiba linüktem rongnung jenjang 3buba akümsü. Iba ya Modi indang guarantee lir," ta pai ashi.

Lanurtem mangdangji pa nukjidong asütsü, ta shia pai, "Tangbo India-i mangdang tulu ayur aser item mangdang ataloktsü atema amang-sangwa methitemi inyaker. Nenok mangdang, meranga inyakba aser kü temelungtetbatemji Viksit Bharat tenangzükba asütsü," ta metetdaksü.



February 26, 2024 nü New Delhi nung BJP National Tir, J P Nadda-i 'Viksit Bharat Modi Ki Guarantee Rath' tenzüksüdüng tangokba noksa nung angur.

# Ravi ayong tzü Pakistan nung yimokba nokdangogo

New Delhi, February 26 (Agencies): Shahpur Kandi barrage project renemba ajanga Ravi ayong tzü Pakistan nung yimoka aliba nokdangogo.

Shahpur Kandi barrage ya Punjab aser Jammu & Kashmir tsüingda arrtsülen lir.

Iba ayong tzü nokdangtetba ajanga Jammu & Kashmir region kanga tajanzük angutsü, kechiyong tamalen Pakistan nem lezmükja aliba tzü cusecs 1,150 tangbo J&K region nung agitsü. Tzüji aluyimba nung amshitsü, talisa Kathua aser Samba district na nung alu nung ali tasazük hectare 32,000 nung tzüji

amshittetsü.

Shahpur Kandi barrage project ya aluyimba aser hydropower generation atema kanga dang tongtibang project liasü saka tesüiba küm 30 tashi timtem aika ajangshiba ajanga mapa mekümteti liasü.

Union minister Jitendra Singh-i, Jammu & Kashmir nung aluyimba tsütsü amshitsü atema Ato kilonser, Narendra Modi-i Shahpur-Kandi dam project atema nendaka inyak, ta ashi.

2018 küm September 8 nü Jammu & Kashmir aser Punjab nati Shahpur-Kandi dam project asentenshir tenzüksü atema

tezüngzüktep ka agia liasü.

1960 küm India aser Pakistan na tsüingda agiba 'Indus Water Treaty' tezüngzüktep kübok Ravi, Sutlej aser Beas ayongtem tzü atema India dak temeden lir aser Indus, Jhelum aser Chenab ayongtem tzü atema Pakistan dak temeden lir.

Shahpur Kandi barrage renemba ajanga Ravi ayongtzü amshitsü atema India nem temeden agütsü. Iba ayongtzü ya Lakhanpur dam tejenba ajanga Pakistan nung yimoka liasü saka tangbo iba ayong tzü ya Jammu & Kashmir aser Punjab na nung amshitsü.

# 'Delhi model' ajanga linük dang lenmang sayur: Arvind Kejriwal



New Delhi, February 26 (Agencies): Hombarnü Delhi Chief Minister, Arvind Kejriwal-i, Delhi sorkar model ajanga shisaliok, health aser electricity tsütsü linük dang lenmang sayur, ta ashi. Assembly nung Delhi sorkari item lenla asem nung inyaktetba metetdaksüdüng AAP tongti lenir aser Chief Minister Kejriwal-i iba o ya jembia liasü.

Pa onük metenzükdang pai züngsemtem dang Aam Aadmi Party (AAP) lenir, Manish Sisodia nem akhüm agüjang, ta mepishia liasü. Delhi excise policy ochimashi ken o dak sendakba nung yaküm iba anogo (Febraury 26) nung CBI-i Sisodia pua liasü.

"AAP sorkari Delhi nung mapa aika inyaktetogo; item mapaji tesüiba küm 75 nungbo meinyaki liasü. Tanübo 'Delhi

model' ajanga linük dang lenmang sayur. Ni sector asem -- health, shisaliok aser electricity indang jembitsü," ta Kejriwal-i ashi.

Kejriwal-i, Delhi nung kaketshir lakh 4-5-i nija school tem toktsür sorkar school tem nung ang azüngtsü atema admission agiogo, ta metetdaksü.

"Asenoki Delhi nung sensaker tanurtem nem shisaliok tajung agütsüetra linük nunga kasaji inyaktettsü. Kechiba state balala nung sorkar school tem shibanger? Delhi dak alaka linük nung shisaliok ya nija school tem nung ang junga ngudar. Linük nung kaketshir lakh 17 atema sen 5 lakh crore dang nüngdaker," ta pai metetdaksü.

Ayushman Bharat health scheme insurance ya ochimashi tulutiba lir, ta pai aitsü.

Delhi Lieutenant Governor, V K Saxena-i Kejriwal dang Delhi nunga iba scheme (Ayushman Bharat health scheme) ya tenzüksüla, ta ashiba sülen anogo ka lir Kejriwal-i iba scheme aitsü.

"Onoki Delhi nung medical treatment ya ajak atema angati kümtsüogo. Parnoki onok dang yangia Ayushman Bharat Scheme tenzüksüla, ta ashir. Ayushman Bharat ya ochimashi tulutiba lir. Ibaji ajanga kechi ashir- 'Onoki nenok nem insurance card agütsü aser ner kibong hospital nung mongra küm ka atema ner kibong nem sen lakh 5 jenjang angati treatment agütsütsü'. Iba insurance ajanga pai kechi inyaksü?" ta Kejriwal-i asüngdang.

"Parnoki sorkar hospital tem shibanger aser nürburtem nem cards agütsür. Iba ya nürburtem nija hospital temi odaktsütsü atema lir," ta pai aitsü.

Kejriwal-isa, tanga state tem ama masü saka yangi Delhi nungbo nürburtemi power supply methitemi angur, ta metetdaksü.



February 26, 2024 nü New Delhi nung Election Commission of India aser Postal department nati Voters awareness atema tezüngzüktep agiba sentong nung Chief Election Commissioner Rajiv Kumar aser Election Commissioner Arun Goel na den Deputy Election Commissioner Manoj Kumar Sahoo aser Department of Posts Secretary, Vineet Pandey nung tangokba noksa nung angur.



**बैंक ऑफ बड़ोदा**  
**Bank of Baroda**

**KOHIMA BRANCH**  
Main Bazar Road, Near Old Taxi Stand, Kohima- 797001  
Email: Kohima@bankofbaroda.co.in

**Kiojen ayoktsü atema Sale Notice**  
APPENDIX- IV-A [See proviso to Rule 6 (2) & 8 (6)]

Securitisation and Reconstruction of Financial Assets and Enforcement of Security Interest Act, 2002 aser Rule 6 (2) & 8 (6) of the Security Interest (Enforcement) Rules, 2002 kübok kiojen ayoktsü atema E-Auction Sale Notice.

Public aser talisa sen apur(tem), Mortgagor(tem) aser Guarantor(tem) nem iba sangdong agütsür, Secured Creditor dang mortgage/charge asüba tsünglanglen shia aliba kiojen **Bank of Baroda** nung Authorized Officer agiadokogo, aser iba kiojenji "Kong koma ali", "Koma lidir yamaji" aser "Yangji aliba ajak" tsünglanglen shia aliba account/s nungi sentsüh alanzüksü atema ayoktsü. Sen apur(tem)/Mortgagor(tem)/Guarantor(tem)/alanzükba aliba kiojentem/sentsüh/Reserve Price/E-Auction anogo aser mapang, EMD aser Bid Increase Amount tsünglanglen metetdaksür-

Sl/ Lot No.	Name & address of Borrower/s / Guarantor/ Mortgagors	Short description of the immovable property	Total Dues	Date of E-Auction, Time of E-Auction, Start Time to End Time	1. Reserve Price 2. Earnest Money Deposit (EMD) 3. Bid Increase Amount	Status of Possession (Constructive/ Physical)	Property Inspection Date & Time
1.	<b>Mr. Hyungwalo Jeshing Rengma,</b> R/o- H. No. E/A-1/01, Agri Colony, Opp. Stella Higher Secondary School, Kohima, 797001, <b>Mr. Kewetso Mero (Guarantor)</b> New Minister Hill, Kohima- 797001.	Land and building measuring 1500 Sq.ft covered by Patta No. 8364 (New), Plot No. 5531 situated at Agri Colony, Kohima, District Kohima, Nagaland standing in the name of Mr. Hyungwalo Jeshing Rengma. <b>Bounded</b> : On the North by: Property of Seyiekhol Angami, On the South by: Property of Hyungwalo Jeshing, On the East by: Nullah, On the West by: Property of Seyiekhol Angami.	Rs. 1,98,87,471.60/- (Rupees One Crore Ninety Eight Lakhs Eighty Seven Thousand Four Hundred Seventy One and Sixty Paise) and interest and other charges thereon w.e.f 30.07.2022.	Date: <b>13.03.2024</b> , Start Time: 01.00 pm End Time: 03.00 pm	1. Reserve Price: <b>Rs. 2,85,00,000.00</b> 2. Earnest Money Deposit: <b>Rs. 28,50,000.00</b> 3. Bid Increase Amount: <b>Rs. 10,000/-</b>	Physical Possession	<b>11.03.2024</b> at 1.30 P.M.

Iba kiojen ayoktsü telatetbatem tejangja metetpelatsü atema yimlibilema website link <https://www.bankofbaroda.in/e-auction.htm> and <https://ibapi.in> nung repringang. Iba dak alia bid asütsüpertemi Authorised Officer den Mobile No: **81199 22922** ajanga tongtepratepsü akok.

**Mr. K H Zhimo**  
Authorised Officer  
Bank of Baroda

Date: 27.02.2024  
Place: Kohima



## TIR YIMYIM YIMOBILEM (EDITORIAL)

DIMAPUR SANGTENNÜ, FEBRUARY (TSÜKLAI) 27, 2024

### Tesem shitak, Nisunga shitak, O Meshitak

**A**ngami nunger benjong tulutiba Sekrenyi taküm küm February 24 nü State Stadium, Dimapur nung kanga longsua mongogo. Atangji, Dimapur nung dang masü saka Angami nunger alidak tesem ajaklen iba sobaliba benjong nung ya pei kin sübusülemtsü agir yartsüngsanga aser chiajema pelatepa amonger. Ajisüaka, taküm küm Dimapur nung amongba Sekrenyi yasa tuluba aser telongsuba mongtetogo. Iba ama pei tsüraburtemi tenteta yutsüba akhi sobaliba benjong mesendoki ano tanü putu nungsa süoshia tajungba sübur aser chiyongtsüa tajungba renemer pelatepa amongba ya senotsü aser nebo endoka langa tajangzük angur. Aji oda, asenok Naga nunger sobaliba benjong yabo shi ango den chiyongtepa pelatepa anogo kisung masü saka benjong aliba agi sobaliba ken aser yartsüngsang angazüktsüsa akümer aser pei tetsü oshi takarba aser tajungba jembia renlokdaktsür. Item tajangzükji dang masü saka sobaliba benjong ya pei kin aser pei yimtsür yimer ajurutepdak aser longjemshidak lir. Iba ama sobaliba benjong amongtsüsabo asenoka akatsüla aser lokti lenir aser yimten yimsüsürtemi nübortem ajungshia tang Angami nungertemi amongba amaji amongtsüla. Aji oda, makamaitba agi mesüra nebo magütsütetba agi pei tsürabur sobaliba memongtetba kin, yim aser kibongji takidak makaba kin, yim aser kibong asütsü, itemji tesamalen i aoe ta bilemdi. Atangji, yimkong tesem ka nung adenshia külemi benjong amongtsübaji temela masü, alemli o tanü asung na balala. Alemliyo yimtsung kaji state ka ama yimten yimsüsüba menden ka kübok küm piyong sentong yanglur inyaka aru, anungji yimtsung ka nung kibong ishika aser nütsünga ishika, tanü ama kibong aser nütsung aika renloka mao, iba jagi pei pei yimtsung nung kibong shiai benjong asoshi renemba agi benjong tulu küma munga aru. Tanübo asenok pei tsürabur yimtsungtem nungi razüka orr akhidang bendang lima asüba agi asen senso lima kümer alir, anungji pei pei yimtsung sasep nung dang masü saka pei kin telongjem ajak külemi lungsutepa benjongtepner. Ibayongji tesem tesadem tulu bushia oa amunger. Kasaji taküm küm Sekrenyi-a Dimapur nung tesem tasademtiba state stadium nung nisung meyrirjang ter dak tali adenshia mungogo. Aji oda, benjong jangratema munga sobaliba akangshiba tajangzük den Chief minister den Deputy Chief minister anapronglai anir tangar yimsüsür aser kintem lenirtem jaoka state stadium tia aser jenjang ngudaktsütsüsa amungbajisa tajangzük tuluba asütsü, kechiyong tenungbo State Stadium saka state stadium-ji merenemtet küm aika nashi aser nabong chiyimdak arem ama kümer aliba tesem ka ajungbena okteter amongba tesem ka liasü. Atangji, Sekrenyi benjong ayongzükertemi sen aser nebu aika oa iba tesemji merükteta inyakogo. Aji oda, tangbo state stadium renema meliaka tesembo merükmerüka angur. Aji oda, taküm Sekrenyi benjong ya tesem shitak ka nung nebortem ajangzüktsüsa ayongzüka litetogo ta bilemer. Ajisüaka, ochishia meinyaktetba agi mapa merenemtetba tesem ka nung nübortem dang yimten yimsüsürtemi akhi tsüraburtem ama meranga inyaktsü aser ochishia inyaktsü ajungshibaji tesem shitak nung nisung shitaki o meshitak jembir asütsü. Ashi, benjong nung yimsüsürtemi benjongmunger ayongzüka jembidang, state stadium tang tashi merenemtetba asoshi sasaba lemsatepba den iba mapa ya memenui renemer Naga lanurtem nem amuoktsütsü asoshi olen ka metetdaksü nungbo nisung mulungjangbo nisung mulungjang dena lir ta nübortemi bilemla. Ajisüaka, tanü putu nübortem tia maka yimsüsürtemi nübortem timtemba aser nübortem nungdak angur saka mereprangteter, iba jagi state stadium-bo state stadium saka stadium yanglua maka, moapu nung Naga nungertem benjongteper ser nung iba nungdakjibo mereprangtet ser senshiogo. Iba jagi kong nungi shibai Faster, Higher, Stronger nung Gold medal ngutettsü ?

## OLEMSABANG

### Ya Shisadangdi

~ Mr. Moachiba

Temelenshiba putu ka nung tanü asenok alir. Küm 10 aser 15 tejaklen asenoki "flip phones" amshia, kanga dang süngmangseta nisunger tokolok shisatsü ainba shisadanga amshitepogo. Tanü asenok ket nung smart phones, iPads, aser mobile devices lir aser item ajanga asen desktop computers-temi küm aika tejaklen inyaktetba mapatem ajak inyaktsü akoker. Tanü tejak o tejak na ajitepa mobile phones ajanga nisung talang nung alirtem dena asenoki jembitsü akoker. Ano kanga dang karakara Artificial Intelligence ainba mapang ka lir. Science ajanga nisung meimchiri inyaktetba ajak aser nisung meimchir tokolok shisatsü danga tuluba machine-i inyaktsü akoktsü sa purateta aoba tetsübutsü mapang ka nung alir. Anungji iba ama mapang ka nung, tanü lanu putu telok koba dang Generation Z ta ajar, parnok dak temelenshi tulu asenoki angur. Putu melentepa arudang putu balala nem nungja agütsüba ji yamai Silent Generation: 1927-1945 nung asortem, Boomers: 1946-1964, Generation X/Busters: 1965-1980, Generation Y/Millennials: 1981-1996, Generation Z: 1997-2012. Anungji lanur tebenjem mapangji tang Generation Z telok ya lir. Temelenshi tajung aika iba Generation Z lanur putu nung asenoki angutsü, saka iba ocet nung asenok shisadangtsü aser mulungdangtsü asoshi tanü putu lanuri ajangshiba tetsübutsü tia kar lemsateper.

1. Tanü lanur teloki mapang teimbaka cell phones, tablets, laptops, aser computers nung dang mapang ajak endoker. Shi nung tejak o tejak na ajitepa sensakasemba dang nungi social media nung dang alir. Iba ajanga chichiba tesentaktep makai, lanur aika azüngmeyakba aser tepela makai akümer.

2. Ano temelenshi tuluka adokbaji tamangba tsütsülen lanur dak kanga sashia kongshiba angur. Joko lanurtemi Tsüngremji mali, mesüra tamangba yimsü ajak (Hinduism, Islam, Jainism, Buddhism etc.) jagi Tsüngrem ka dangi dang anir ta asüba mapang ka asenoki ajurur. Tanü lanurtem asoshi Khrista dak tamang takang ayutsü alimai mesayutetter, saka pei bilemba, aser alimai tongtettba aser sayutettbaji dang shitak lir ta jajaba tetsübutsü mapang ka lir. Anungji Tsüngrem memeteba aser Pa nungi pilaba lanur telokji tulukasa kümogo.

3. Tokolok shisatsü shirangba nung tanü lanu putu tim atemer (Mental and emotional health). Anungji akhi mapang dang nungi tali lanurtem rongnung suicide cases ainba angur, tarutsü asoshi teimla makai lanur aika tokolok shisatsü nung shiranga timtembapurtem aika lir.

4. Tanü lanur lokti nung pei ayak (identity) dak sentakba nung timtemba purtem aika lir. Alima ainba den pei ket nung mobile phone ajanga alima ajak ngutettsüsa, alima tesem ajak nung sobaliba aser yimyatem ngutettsüsa aser angazükttetsüsa aliba putu ka nung, tanü lanu putui Tsüngremi Pa sendong tajung nung tobur junga yangluba ayak samadaksür. Anungji tetsüri tebur akumtsü jangrar, aser teburi tetsür akümtsü jangrar. Ano kasa tetsüri tetsür den aser teburi tebur den atsüabungba tanü asen jakdang lanur tem alimai aniba aika dang angur.

Anungji item tebilemdangtsü khurettem agi kibong nung tsüraburtem, Arogo, Lokti, aser Arogo nung lanurtem ajak asoshi teinyaktsü shilem tulu lir ta angatetter.

T. Ken 78: 1-8 nung nebortemi Tsüngrem dak tamang ayutsü aser Tsüngremer tekümzükba mapa pututem aser mapangtem melentepa aoba den lemsateptsü tongtibang ta angatetter. Putu melentepa aodang lanurtemi Tsüngrem dak tamang yutetta aser Pa ozüngtem benshitsü asoshi Tsüngrem O dak azüita ainba lanur taküm kaka asütsü yaritepdi. Kibong nung tsüraburtemi aser Arogo nunga lanu putu asoshi khuret kanga sarasadema abentsüla. Tiyazü alima tesayuba, teraksatsüba yimyatem koba temeshi Lai tesayuba nungi pilaa lir, iba nungi Tsüngrem dak tsüngchi tamang takang yutetta aliba lanur asütsü maneni ajungshitepti.

*(Iba ocet ya Changtongya Town Baptist Arogo nung lanurtemi küm nung khen adokba "Tebnjem Washir" 2023 kakat nungi agiteta adoktsür)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**



February 23 nungi 25 tashi Waromung Baptist Arogo nung Mr. & Mrs. Chubatoshi Lkr (Unger), par kibong sponsor süa kiyim lanur asentenshi sentong tajung ka ayongzüka katsüogo. Iba sentong nung tongti o jembirji Mr. Lanurenba (Director Emanuel prayer centre) Dimapur nungi liasü aser kentener Mr. Toshi Langu den counselor parnok pezü arua aden. Arogoi sangdong ka ajanga par kibong aser team dang kanga pelaba metetdaksü.

### Tanzania nung gari lendong nung YWAM nungi missionary 11 asü

**February 26, 2024:** Honibarnü (February 24) Tanzania kübok Arusha anasa bus tsüktepba lendong nung Youth With A Mission (YWAM) nungi missionary 11 süogo; gari aika tsüktepba lendong nungji bus anisang densema tangartem-a aika asü. Honibar anepdang YWAM-i sangdong ka ajanga, "Ghonda ana tejaklen Tanzania kübok Arusha anasa bus lendong atalok, aser iba lendong nungji Nations Executive Masters course agir YWAM züngsemtema asü. Missionary tem aser iba course agirtemji bus ana nung aoba mapang nung truck kati bus ka dak tsükoktsü," ta metetdakja liasü. Amongnü YWAM-i sangdong ka ajanga, "Tang Tanzania nung anepdang lir, aser gari lendong nung yirur ozü missionary ano asem süogo, ta onoki tejashi nung sangdonger. Tang ozü medemer (missionary) 11 Yisu den külemi

lir. Ano missionary ana hospital nung kanga mejungi yirur lir," ta metetdaksü. "Iba lendong agi kongshirtem, parnok kibongtem aser nüburttem onoki nungiter. Senotsü, nübo aser tanela nüngdak ajak peritsütsü atema onoki inyakdar," ta YWAM-i metetdaksü. Honibarnü iba lendong atalokba sülen YWAM-i parnok indang website ajanga par züngsem missionary 8 asüba metetdakja liasü, ajisüaka Amongnüa missionary asem asüba densemabo missionary ajak senteper 11 süogo. YWAM-isa iba lendong nung asür kinüngertem, medemertem aser team züngsemtem den mangyim jashi lemsatsep. Security kuli kar ajanga iba lendong nung asür missionary tem tenüng aser linüktem tenüng mesangdonger, ta YWAM-i metetdaksü. Bus ana nung YWAM

missionary tem aser candidate tem aoba mapang nung truck kati bus ka dak tsükoktsü aser bus kajibo kecha mesüi Arusha nung aliba YWAM campus tonga ao. Osang angazükba agi, bus ka densema gari pezü tsüktepba lendong nungji bendanger asem densema nisung ajak senteper 15 asü aser nisung 12 kanga mejungi yirua liasü. Arusha anasa Ngaramtoni kiyong nung truck ka 'brake' mejungi akümba ajanga iba lendong ataloka gari ajak tsüktep. Arusha regional commissioner, Justine Masejo-i, lendong ajuruba gari ka nungbo New Vision School nungi kaketshirtem aser tesayurtem mena liasü, ta metetdaksü. Iba lendong nung yirurtemji Mount Meru referral hospital aser Selian Lutheran Hospital densema hospital balalai anir ao.

### Ukraine nung rara ajanga tanur million 3 timtemdar: Khristan charity

**February 25, 2024:** Küm ana tejaklen Russia-i Ukraine amakba sülen küm ana ajungba mapang nung Khristan melungtet telok- World Vision (WV)-i, tang Ukraine nung tanur million 3 shi timtemdar, ta metetdaksü. World Vision-i, "Teyari kanga rongdak nüngdaker. Rara ajanga tanur million 3.3 kanga timtemer aser rongdak teyari nüngdaker. Nüngdak balala rongnung tongtibangtiba anaji- parnok taküm kümzüksü aser shisaliok agütsütsü nüngdaker," ta metetdaksü. World Vision den jembidang Lviv Oblast nungi arrshi küm 9, Eva-i, "Ni kübo atema kanga shisabulur. Tang pai rara nung shilem agidar. Ni online ajanga agiba class nung adener, ajisüaka hopta shia 'air alarms' ajanga class junga magiteter," ta metetdaksü.

Eva'er tesayur Roman-i, "Tanurtem kanga takoksa angur, kechiyong tanurtem angazüktsü aser tekolok arentsü atema tang mapang ya kanga tongtibang," ta metetdaksü. "Tanurtemi shisaliok nung rangloktsü mapang, ajisüaka rara aser tarutsü tia mejangjaba ajanga parnok shisaliok nung temelung magütsüteter," ta paisa metetdaksü. World Vision Ukraine Response Director, Chris Palusky-i, "Rara manenba ajanga tanurtem tarutsü tia mejangjar. Alima nung technology kanga tejakleni ogo, ajisüaka asenoki kechiba tanurtem timtemdaksürar ni mangateter," ta ashi. "Iba ya tayongzüka ka lir, anungji tensa koma mejunglir mejungaka onoki tezü metangi

inyaktsü. Tanur ajak taküm junga alitsüji World Vision mangdang lir, aser iba tenangzükbaji onoki atalokdaksütsüla. Asenoki maneni Ukraine nung tanurtem atema sarasademtsüdi, imladi aser meranga inyakdi," ta paisa metetdaksü. World Vision-i, tang Ukraine nung teyari nüngdaker million 14 shi lir; organization balala, tenla agütsürtem, local partners, sorkar agencies aser nüburttem longjemer inyak nungang teyari nüngdakerbapurtem nem teyari agütsütettsü, ta metetdaksü. UNICEF-i ashiba agi, Ukraine nung rara ajanga tanurtem shisatsü nung kanga mejungi kongshiogo; talisa Ukraine anüdoklen aliba region nungbo tsüraburtem shilem 56-i parnok chirnurtem tsübua dang alir, ta shiogo.

## ANO GO ABEN TSÜNGREM DEN

### Taremzüc ajanga tesünep

"Tang tesüneptsüba Kibubai peisasa mapa ajak nung ajaklen nenok nem tesünep agüjang"

(2 Tesa 3: 16).

Shimok temulung Kibuba nung sendaka lir, pamok nem tesünep teperi agütsütsü tenangzücba Laishiba nung angur (Isa. 26:3). Iba ama tesünep angutsüba jenjangji Kibuba nung aremzüka ataba lir, "Shibai amanger, pai meilungtsü" (Isa 28:16).

Asen temulungjang nung tesünep melira, asenok tangar den tesünep nung melitettsü. Loktiliba nung telemsa aliba ajanga nisung mulungjang nung teti rongrong alir. Tsüngrem tesünepi asen tangatetba ajak atendanger (Fil. 4:7). Koba tetezü, tebilemtsü liaka asenoki Tsüngrem tesünep nung pelateptsü akok. Ataba aser aremzükbaji nniim o lir.

Tsüngremeri Khristantem metsü aser tesangwa asütsü asoshi aja, saka metsü tanang aser tesangwa samadok. Arogotem aser Khristantem tesempatep, meputep aser tsükchitep rizükdak kümdaksü. Yimjung yanglutsübaji kin jenjang nungi tenzüiksüba masü. Ibai kibong aser arogo aser pei alidak lokti nungi tenzüker.

Tsüngchir tejangja temaitsü kaji pa yimjung yanglur asütsüla (Mt. 5:9). Yimjung yanglutsürtem dang nungi yimjung raksar teimba akümer. Adianu rongnung rarabangsen prokba nisung Tsüngremi sempar. Pa chirtem ama yimjung yangluba mapa nung Tsüngrem den külem mapa inyakertem asütsüla. "Yimjung yanglur temi moa".

Kibuba, ni Ne yimjung asoshi nok-o-nü ka kümjang.

### Burkina Faso linük nung Tenla ki ka amakdang nisung 15 asü

**February 26, 2024:** Amongnü mapang shia al-Qaeda aser Islamic State den sendaktepa aliba Islamic kiralongrartemi nisung 15 süogo, ta osang ka ajanga metetdaksü.

mapang shia al-Qaeda aser Islamic State den sendaktepa aliba Islamic kiralongrartemi nisung 15 süogo, ta osang ka Tenla kitem amaker.

Oudalan province kübok Essakane yimdak Catholic Arogo Tenla ki amak. Iba yimji Mali den arrtsülen lir.

Alima nung Khristantem alitsü linük tamajungtiba 50 rongnung Burkina Faso ya jenjang 20buba nung lir (Open Doors World Watch List). Iba linük nung Islamic kiralongrartemi mapang shia Khristantem anema inyakba aser yimten tashi maitba ajanga Khristantem kanga timtemer.

Dori diocese nung tongti, Jean-Pierre Sawadogo-i, Amongnü Khristantem tekülem sentong tagidak mapang nung prangpong amer telok kati tamangertem amakdang iba tesem nungjisa nisung 12 asü aser nisung asem mekümzükteti hospital nung asü, ta metetdaksü.

Nütsüng million 24 shi aliba Burkina Faso linük nung Khristan nütsüng million 5.3 shi lir.

Sawadogo-i sangdong ka ajanga, "Tang ama mangyim jashi mapang nung Tsüngrem dang nungi tesünep meshia sarasademjang aser yirua alirtem aneptsü atema sarasademjang. Iba dak alia asen linük nung nisung tepsetertem aser timtem agütsürtem temelung meyiptsü atema sarasademjang," ta mepishia metetdaksü.

Khristan melungtet telok, Open Doors-i, "Burkina Faso ya yimsü balala amanger ajak longjema aliba tesem ka liasü, ajisüaka Islamic kiralongrartem ajanga tangbo Muslim nunger aser Khristantem na tsüngda tesünep nung melitetter," ta metetdaksü.

Prangpong amertemji Islamic kiralongrartem asütsü akok, ta melung malemer.

Burkina Faso linük nung tesem balala nung jenshiogo.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Songla**

(v) tetsüing teben kangtena aliba metonga songtok ( stretch out of legs or arms)

\* Shiranger tetsüing songlaa menden talang nung mendaktsü.

**Songlok**

(v) Khu tali abentsü atema süng asongba ( fix additional supporting poles)

\* Gari tesülen süng süngloker khu ajak enoka aben.

**OLONG PAITEP # 6710**

1			2			3			4
			5		6		7		
8									
			9						
	10								
								11	12
			13				14		
15						16			

**TIPIEN**

- 1. Anenzükdak ki - (5)
- 3. Asür mangyimba - (5)
- 5. Temulung nung shisadang - (5)
- 8. T \_ \_ \_ lu - (3)
- 10. Takdang temalen - (9)
- 11. Tesa \_ \_ \_ a - (3)
- 13. Ajungbena temulungjang tongtonglatsü atu - (5)
- 15. Tejen lai nung tesayur - (5)
- 16. Tsüingsak-mopung - (5)

**LANGTSÜNGLEN**

- 1. Reprangdaktsü - (4)
- 2. \_ \_ \_ ur - (3)
- 4. Kiojen yangludak - (6)
- 6. \_ \_ \_ \_ \_ ait - (7)
- 7. Nagaland nung ayong ka - (5)
- 9. Küm kasa purtem - (5)
- 10. Tetsüing tajemeldak - (6)
- 12. \_ \_ \_ \_ adenshi - (4)
- 14. Tsünüsenbongtsü adokdak - (3)

**OLONG PAITEP # 6709 TELANGZÜBA**

**TIPIEN :**

- 1. Kasa, 6. Rangben,
- 7. Mait, 9. Poktet, 11. Ati,
- 13. Atasa, 16. Rür, 17. Rajang,
- 20. Lanu, 24. Nüngjem,
- 25. Süra.

**LANGTSÜNGLEN :**

- 1. Khu, 2. Süjak, 3. Onük,
- 4. Oba, 5. Anü, 6. Ratet,
- 7. Mozü, 8. Ita, 10. Tar, 12. Tinu,
- 14. Salem, 15. Aja, 18. Anünü,
- 19. Tajü, 21. Ano, 22. Onü,
- 23. Kua.

**NAI-A YA METETTER MA**



**Southeast Asia nung "Swift effect" ajanga kongshitsü lir kechiyong nüingtugu kentener Taylor Swift-i March 2-9, 2024 tashi Singapore nung amongtsü.**

**US superstar Swift-i National Stadium nung Eras Tour shows 6 tashi sold-out süogo aser Singapore nung alir den temeket linüktem nungi nisung 300,000 temai kenten sentongtem nung adentsü. Iba atema takartemi Marina Bay Sands indang luxury packages book süogo iba hotel-i Taylor Swift indang ken- "Shake it Off" aser "Stay Stay Stay" amala amshia luxury packages sayaogo.**

**Marina Bay Sands hotel indang SG\$50,000 (\$37,230) "Wildest Dreams" package nung VIP tickets, fine dining, a hotel suite, limousine transfers aser tourist attractions passes dena lir.**

**Assam nung microbiology lab 1 aser mobile food testing labs 17 amenok**



**Guwahati, February 26, 2024** Food Safety on Wheels (FSWs) ta ajaba mobile food testing laboratories 17 agütsüogo. Prime Minister Narendra Modi-i Deobarnü microbiology laboratory aser FSW lapoktsü. Iba microbiology laboratory ajanga food products nung pathogen dena microorganisms balala putettsü. Külen FSWs

nung cutting-edge facilities aser expert staff lir aser iba ajanga chiyungtsü tendangba dang masü saka food safety practices atema nüngdakba training tem agütsütsü.

Assam nung Microbiology Lab 1 aser FSWs 17 ya Rs 13.11 crores endoka amenokogo.

Baminumaidam, Guwahati nung ayonga agiba sentong ka nung state health minister Keshab Mahanta-i Prime Minister Modi aser Union health minister Mansukh Mandaviya na dang pelaba metetdakttsü.

Iba sentong nung Guwahati MP Queen Ojah, state health commissioner P Ashok Babu, National Health Mission (NHM), Assam mission director MS Laxmipriya aser health and family welfare state secretary Barnalaai Sarma nunger aden.

**Churachandpur district nung internet shibangba atsülanger**

**Imphal, February 26, 2024** tensa asadanga sülen March 2 tashi internet services aser mobile data services shibanga atatsü lemtetogo" ta Home Department-i metetdakttsü. Churachandpur district nung February 16 nü nisung telok kati Superintendent of Police aser Deputy Commissioner office tem nungpoka atuba aser sorkar osettem raksatsüba sülen Manipur sorkari internet

services shibangtsü tetuyuba agüja liasü.

Nisung telok kati mini-secretariat nungpoka atundang sepaitem den raratep aser idangji nisung ana asü. Manipur police head constable kati prangpong amer kar den agiba video ka social media nung prokshiba sülen pa mapa nungi anentsüba anema lungkak aidang iba ya atalok.

**Manipur nung OC-ranked police officers 33 mapa belen**

**Imphal, February 25, 2024** ECI latetba sülen anidakttsü atema transfer asür ta Manipur Election Commission of India (ECI)-i tuyuba nung ajemdaker Manipur sorkari police personnel (Officers-in-Charge) 33 tashi mapa belentsü tetuyuba agütsüogo.

agütsübatem agientsü ta pai ashi.

Manipur Police Training Centre (MPTC) aser pei pei Superintendent of Police/Commandant temi iba tetuyuba sülen anidakttsü metetdakttsür ta DGP Rajiv Singh-isa metetdakttsü.

**Manipur nung ali acre 69 nung poppy alu raksatsü**



**Imphal, February 26, 2024** den arrtsü anasa lir. Sub Divisional Magistrate, Tengnoupal lia Deobarnü opium poppy flowers raksatsü ta ketdangsürtemi ashi. Maneni, Nagaland den arrtsütepa aliba Senapati district nunga Senapati district police, 109 Battalion CRPF aser 4th IRB Taphou ajanga ali acre 10 nung poppy plants raksatsü. Iba tesem nung Naga nunger teimba ser alir. Bangdak SDCs lia Senapati police station kübok Sadim hill range nung poppy alu raksatsü.

Iba mapa nung Tangkhul Naga outfit volunteers-ia yaritep aser parnoki Ukhrul district kübok poppy alutem raksa endoktsür.

Tatema Indo-Myanmar arrtsülen Khamasom hill range nung ali acre 50 shi ka nung opium poppy flowers raksatsü.

"Ali acre 70 shi ka nung poppy alu raksatsüba ajanga asenoki drug trafficking aser illegal narcotics production anema inyakba nung tajangzük nguogo" ta Manipur Chief Minister N Biren Singh-i ashi.

# Russia-i amak tenzüker sepa 31,000 süogo: Zelensky

**Kyiv, Tsüklai/February 26 (Agencies):** Russia-i tashi ajak amshia amakba mapang Ukraine sepa 31,000 tepsetogo ta Volodymyr Zelensky-i ashi.

Ukraine tiri yirur aliba sepaitem indangbo mashitsu, kechiaser ibaji ajanga Russian mitkar sentong yangluba nung yaritsu, ta ashi.

Ukraine ketdangsurtemi yimjak nung nisung asüba indang asangdonger aser dangari asadanga ya kanga agi timba lir.

Ukraine asoshi anüolen linük temi teyari agütsüba tesadang ka menuogo aser iba yongji nisung takum aser litsü-lika akoksar ta defence minister-i shir sülen iba osang ya sangdong.

Russia-i sepa tali asüba indang osang sangdongba mechi asürtem züingdanga tejangja metetdaksür, ta Zelensky-i Deobarnü ashi.

"Iba rara nung Ukraine sepa 31,000 süogo. 300,000 masü mesüra 150,000 masü, mesüra Putin aser par teloki ashiba ama masü. Ajisüaka asüba ajak ya onok asoshi takoksa tulu lir."

Iba rara nung takoksa tulu

indang jembidang, Russia-i amokbangba Ukraine nung civilian meyirijang aika süogo saka tejangja memetet, ta Zelensky-i ashi.

"Parnok kwi asüar ni memetet, kwi tepset, kwi reshikangshia amshi, kwi linük nungi meindokar ni memetet."

August ita US ketdangsurtemi Ukraine sepa asüba 70,000 aser yiruba 120,000 ta shia liasü.

Russia sepa 180,000 tepset aser meyirijang aika yiru, ta Zelensky-isa ashi.

BBC Russian aser Mediazona website lungjemer bushisüingdanga nung Russian sepa 45,000 dak tema asüba jangjatet. Saka iba dang timba sür alitsu südi ta ashir.

United Kingdom indang defence ministry-i Russian sepa 350,000 asü mesüra yiru, ta February ita asadangteta liasü.

Defence minister Rustam Umerov-i anüolen tembar linüktemi mitkar nem teyari agütsüba menur ta ashiba sülen Tir Zelensky-i iba sangdong ya agüja liasü.

"Tang atema nangzükba ya agütsüba masü," ta pai ashi.

Ukraine-i par litsü nungi Russian sepaitem meindoktsü merangba nung tamakok balala ajurur.

Hadir agi anüingba ajanga Ukraine takoksa len lir, ta Umerov-i shia liasü.

"Onoki takoktsü aser tamakoktsü ajak inyaker, saka mapang shidak nung teyari maliba ajanga onok akoksar," ta pai ashi.

European Union-i March ita tashinung artillery million ka agütsütsü sentong aliba mataloktsü ta Germany-i November ita tekumdangtsü shia liasü.

January ita EU-i nangzükba tesadang ka March ita tashinung Ukraine atongtsü aser tanüingba ajakbo 2024 küm tatem tashinung ang tongtettsü ta shia liasü.

Hadir peria maliba ajanga Ukraine-i meyiper makyonga aotsü kanga yongya ataba ama kera metenzüktet, ta Tir Zelensky-i ashi.

Taoba hopta Ukraine sepaitem anüdoklen Avdiivka jila nungi ainshir ta sangdonga liasü, koba ita aika tsüingta Moscow asoshi takok tulutiba liasü.

# South Korea doctor tem mapai meyipa arutsü anogo latettsü

**Seoul, Tsüklai/February 26 (Agencies):** South Korea sorkari tang longkak aita aliba lanur doctor tem dang anogo pezü tsüingda mapai meyipa arutsü mapang latettsüogo aser ashiba agi, tetuyuba ama minyakra temzüng ozüing dak ajemdaker merenshitsü aser parnok indang medical licences tem agintsütsü.

Sorkari medical school admissions shilem 65 shi agi timba kümdaktsütsü atema sentong aliba anema medical intern aser residents 9,000 shi mapai moi longkak aita aliba mapang sorkari Hombarnü iba tetuyuba ya agütsüogo.

Taoba hopta nungi item longkak aiterem mapai maoba ajanga parnok inyakba mozükitem nung tetsükdaktsü tulu adokogo aser surgery aser tanga treatment tem aika athitsüsa aküm.

Safety Minister Lee Sang-min-i ashiba agi, doctor temi longkak aitba ajanga mozükitem nung mepetmesü tulu adokogo aser emergency service tem lendong tulu nung lir.

"Tensa kanga mejungi akümba apir sorkari iba tatembangbuba temepeshiba agütsüogo," ta pai ashi.

"Nenoki toktsüba mozükitemi February 29 nü tashi nung maru nungbo, tang tashi nung kechi ataloka lir item ajak ya nenok khuret asütsü. Nenoki shirangertem anasa aliba mapangang nenok ola ya tejangjaba angashitsu ta bilemtetang," ta pai ashi.

Sorkar ketdangsurtemi

ashiba agi, South Korea nung tantsür tamburtem aika küma aoer aser ibayongji doctor talila nüngdaker. Linük nung tang doctor-to-patient ratio ya developed world nung ajak dang tajemtiba lir.

Kasa mapang nung longkak aita aliba lanur doctor temi ashiba agi, sorkari doctor tem timba maniok tsüingda taah aser mapa inyaktsü mejungi aliba dak sendakba ken o bentettsüsüla.

Vice Health Minister Park Min-soo-i ashiba agi, February tatem tashi nung shirnok mapai marulir parnok tajemba agi ita asem tashi medical licences suspend süja merenshitsü.

Paisa, parnok ya temzüng ozüing dak ajemdaker bushisüingdangtsü akok, ta ashi.

South Korea indang medical temzüng ozüing kübok sorkari tensa majung ta asatetra doctor aser medical personnel tanga tem nem back-to-work order agütsütettsü.

Iba tetuyuba sülen manidakertem küm asem tashi tepuokdak ayutsü akok mesüra senchi won million 3 achitsu akok aser iba den medical licences dena agintsütsü.

South Korea nung medical interns aser residents 13,000 shi lir aser parnok ya timba mozüki 100 shi nung mapa inyaker aser training agidar. Parnok yagi surgery mapang senior doctor tem nem teyari agütsür aser mozüki nung munga aliba shirangertema anepalur.

Mozüki tongtibang kar nung

parnok ya doctor tem ajak senteper shilem 30 nungi 40 tsüingda asütsü.

Korea Medical Association kübok doctor 140,000 shi lir aser parnokia longkak aita aliba doctor tem pusemba metetdaksüogo, ajisüaka parnoki longka aita aliba doctor tem den parnok adentsü madentsü iba indang osang kecha magütsü.

Maneni doctor tejentemia sorkar sentong anema parnok tebilemba lemsa rally aika ayongzüka agiogo.

Iba ita tetenzüklen sorkari taruba küm nungi tenzüka university tem nung medical doctor talila 2000 anioktsü ta sangdongogo. Tang Korea nung medical kaketshir 3,058 lir.

Sorkari ashiba agi, parnoki 2035 küm tashi nungbo doctor 10,000 bendenloktsü sentong lir.

Nüburtem survey ka agiba sülen South Korea nung shilem 80 shi-i sorkar sentong pusemba ngutetogo.

Ken o asadangertemi ashiba agi, South nung itasen tajungtiba anguba mapa rongnung doctor mapa ya ka lir, aser doctor tali kümra parnok den tetokteper tali akümstsü aser parnok rongsen peria mazüktettsü ta bilemba ajanga iba sentong ya anemer asütsü südi.

Longkak aita aliba doctor temi ashiba agi, tetokteper tali akümba ajanga nüburtem nüngdakba dang nung tali temang anepaluja senotsü aika intokdaktsütsü ta shisabulua bilemer.

OFFICE OF THE  
CHANGTONGYA SENSO TELONGJEM DIMAPUR  
DIMAPUR: NAGALAND  
Motto: Telongjem Aser Teyaritep

Ref. No : CSTD/2024/C-PR/1 Date : 26/02/2024

**TENÜNGSANG AGÜTSÜR**

Tsünglanglen tenüng agüja alirtem pei mapa nung tawa temaba jenjang ajangteta yimer nem konang-tetushi bener arutsüba atema Changtongya Senso Telongjem Dimapur (CSTD), Dimapur Changtongya Tsür Telongjem (DCTT) aser Changtongya Kaketshir Telongjem Dimapur (CKTD) ajanga pelaba lemsateper aser tenüngsang agütsür:

1. **Shri. Tamsuwati Longkümer** NCS, S/o Er. P. Imrong Lkr, Deputy Commissioner, Kiphire jenjangi atuba.
2. **Shri. Chubatemjen** NCS, S/o Shri. A. M. Toshi Jamir, Joint Secretary, DUDA jenjangi atuba.
3. **Er. I. Talisunep Jamir** S/o Shri. Imsuwaba Jamir, Executive Engineer (EE) PWD jenjangi atuba.
4. **Smti. Y. Anungla** D/o Imlitongzuk, SDEO, School Education jenjangi atuba.

Ner tarutsü wadang nung anema aliba aser takokba lidakang ta sarasademtsür.

Sd/- President. CSTD.	Sd/- President. DCTT.	Sd/- President. CKTD.
-----------------------------	-----------------------------	-----------------------------

Office of the  
**Mangmetong Yimlang Riongsanger**  
Putu Menden  
**SANGDONGER**

Mangmetong 'B' Khel Riongsanger Putu Menden ajanga nübur ajak dang osang ka yamai sangdonger.

Ozü lushi nung bendanger shinga arem-yata/shikari asütsü memelar. Ano Tzübi ayong nung ozü juri tzü Metsüja Ahit nungi Nokja yongrü, Sajem azü nungi Hamparü, Choyarü nungi Kübza Samendang ayong, Alongtsükma nungi Tzümerem azü tashi aser Arangya nungi Chajiba ayong telongtep tashi, item tesemtem nung kari danga ozüing memelaba mapa inyakra/benshira Putu mendeni temerenshi tulu alitsu.

*Plm 26/2/24*  
Alemtemjen  
Putu Chairman

*pmg 26/2/24*  
Posonungsang  
Putu Secretary

**LAND FOR SALE**  
Behind Sovima Cricket Stadium  
RATE Rs. 490/- per Sq.ft.  
ANY SIZE AVAILABLE  
- Price Negotiable -

**CONTACT**  
8974020568

# Palestine PM menden nungi Shtayyeh aluogo

**Ramallah, Tsüklai/February 26 (Agencies):** Palestine Ato

Kilonser Mohammad Shtayyeh-i par sorkar anenba sangdongogo, shirnoki occupied West Bank kar nung yimsü asür, aser occupied territory nung azüdokshi tali akumba aser Gaza nung raraba mechi sorkar anener ta ashi.

"West Bank aser Jerusalem nung tensa tali tamajungba akumba aser Gaza Strip nung rara, kin ajunga samatsüba aser ayaba ajanga sorkar anentsü telemtetba agi," ta Shtayyeh-i ashi, shibai Palestinian Authority (PA) Tir Mahmoud Abbas nem Hombarnü tezüluba agüja liasü.

"Palestine nunger telongjem nung ajemdaker Palestine nungeri mulungba ama sorkar tasen ka kumtettsü nüngdaker," ta pai ashi.

US-i Abbas dang PA melenshia aser rara sülen Palestine linük ka yimsü asütsü atema political structure yanglu tenzüksü tali ajungshiba mapang Shtayyeh-i iba sangdong ya agütsü.

Ajisüaka Palestine linük ka azüoka Gaza nung yimsü asütsü Abbas kübok PA amenoktsü jembiba Israel Ato Kilonser Benjamin Netanyahu-i magizüker.

Palestine nunger linük ka kumtettsü Netanyahu-i memulungba Israel ozüing yanglurtemi taoba hopta

bhukuma liasü.

"Palestinian state ka amenoktsü asoshi merangba anema Knesset lungjemer nokdak, koba ajanga yimjung bener aruba nung tamakok angutsüba kisüing masü saka Israel linük lendongi aitsü," ta Netanyahu-i ashi.

Ajisüaka Palestinian Ministry of Foreign Affairs-i iba vote aitsü aser Palestine nunger litsü rakzüka Palestine nunger pua aliba temeden Israel-i soita ayur ta ashi.

"State of Palestine ya United Nations nung züingsem tejangja ka lir aser danga linük temi agizüktsü asoshi Netanyahu nungi temelaba menüingdak," ta sangdong ka nung ashi.

1990s tetenzüklen Oslo Accords nung meyongnem agütsüba sülen linük ana akumtsü asoshi inyaktepba nung terenlok kangabo mali.

Hamas teloki October 7 nü Israel south tsütsü maka nisung 1,139 tepsetba sülen occupied West Bank nung azüdokshi tali kumogo. Israel-i tayang kepzüka Gaza nung bomb pokloktsüba mapang Palestine nunger civilian 29,000 dak tema süogo, ta Gaza Strip nung ministry of health ajanga ashir.

Kasa mapang occupied West Bank nunga Israel nungeri nisung 401 tepsetogo, ta Palestinian health ketdangsurtemi ashir.

# Japan nunger asayar Shinji Okazaki asaya nungi anentsü



**Tsüklai/February 26, 2024 (Agencies):** Taoba mapang Japan nunger international asayar Shinji Okazaki, shibai Leicester City nungi asayaba mapang 2016 kum Premier League koka liasü, pai Hombarnü sangdong ka ajanga pa asaya nungi anentsü telemtetba agiba sangdongogo. Okazaki ya kanga dang meranga asayaba forward asayar ka lir, aser 2015-16 season nung Claudio Ranieri lenisüba nung Leicester City puri mimlai lia mezüngbuba Premier League akokba nung pai tongtibang shilem agia liasü. Iba season pa Premier League asaya 36 nung asaya aser iba mapang goal pongu idakja liasü. Arishi kum 37 tain asayar ya

Japan nunger asayartem rongnungi goal timtiba idaktsüba asayar tasembuba lir. "Season tembangba sülen ni asaya nungi anentsü telemtetba agiogo," ta Okazaki-i Instagram ajanga metetdaksü. "Ni football asayar ka ama ajak agütsüogo, saka kü temang agi metizüker ta angateta aruogo aser joko tasayatetsüba tashi kabo asayatokogo," ta paisa shisem. Okazaki ya J-League nung Shimizu S-Pulse club nung asaya-a pa indang career tenzük. Pa Germany nung Stuttgart aser Mainz nungia asayaogo aser iba sülen 2015 kum Leicester nung dena liasü. Parnoki league akokba kum Newcastle den asayaba

mapang pa overhead goal tajung ka idakja asaya ti asayatsü anunga lia Ranieri-i aniba team ya temaba jenjang nung point pongu agi tejakdang aküm.

Iba season tembangba sülen Ranieri-i, Okazaki ya team atema kanga dang tongtibang asayar ka lir, kechiyong pai kanga nongshia asayar, ta ashi.

"Pa ya onok indang 'dilly-ding, dilly-dong' lir. Pai asayartem mesor - pai tsüngtsüng bena lir," ta Italy nunger coach yagi ashi.

Japan team nungi asayaba mapang Okazaki World Cup asem tashi nung asayaogo aser 2011 kum Asian Cup akokba Japan team nunga pa densema liasü.

2019 kum Leicester toktsür aoba sülen pa Spain nung club balala nungi asayaogo aser pa tang Belgium nung Sint-Truiden nungi asayadar.

Pa iba season yiruba ajanga December ita nungi tang tashi khen danga masayai arudar.

"Season tembangba sülen ni ni asaya nungi anentüba indang tanaben jembitsü," ta pai ashi.

"Ibaji matong tsüngda ni temang anema küma team asoshi asayatsü merangtsü," ta Okazaki-i ashi.

# Ind vs Eng: India-i Ranchi nung Test pezübuba kokogo

**Tsüklai/February 26, 2024 (Agencies):** India aser England na tang asaya aliba Test asayamung nung India team-i maneni kanga junga asaya Ranchi nung Test pezübuba nung England team wicket pongu agi kokogo. Iba asaya akokba sülen India team-i kidang Test asayamung 17buba atonga kokogo.

Hombarnü asayar ka danga out masü sür run 40 yanglur lia asaya tenzükba sülen captain Rohit Sharma (run 55; ball 81) aser Yashasvi Jaiswal (run 37; ball 44) na senteper run 84 yanglua asaya kanga junga tenzüksü.

Tena out asüba sülen Rajat Patidar aser Ravindra Jadeja nata kanga kara out süadok aser ibayongji asaya melenshia liasü, ajisüaka Shubman Gill (run 52 not out) aser Dhruv Jurel (run 39 not out) na senteper run 72 yanglua tenati team takok dangi ania liasü.

Tanabuba innings nung England bowler tem rongnungi Tom Hartley-i (1/64) Rohit out sütsü saka parnok rongnungi Shoab Bashir-i ball tajungba onteta pai run 79 agütsür wicket 3 agia liasü.

Iba asaya akokba sülen

India 3-1 agi tejakdang lir aser tatembangbuba asaya Dharamsala nung March 7 nü nungi tenzüka asayatsü. India team ya kidang tatemsa 2012-13 nung Alastair Cook-i aniba England team-i 1-2 agi koka liasü. Iba sülen India team-i kidang Test 50 asayaba nungi 39 bo kokogo.

Kasa mapang nung iba asayamung akokba sülen India team World Test Championship (WTC) rankings nung tanabuba nung jenjang yanglushiogo.

WTC nung India team point percentage 59.52 aliba nungi 64.58 kumogo aser iba ajanga tasembuba aser pezübuba jenjang nung aliba Australia (55%) aser Bangladesh (50%) team den point percentage tetsüngda ita kumogo.

Maneni asayamung makokba sülen England team tibubai asepzüka luogo aser parnok indang point percentage 19.44% kumogo aser parnok ya ponglang nung aliba Sri Lanka jakdang dang lir.

Tang asaya aliba WTC cycle nung India team Test ti nung asayaogo. Parnoki asaya pongu kokogo, ana makok aser ka draw süa liasü.

# Laureus World Sports Awards: Haaland, Johnson & Bellingham nunger nominate süogo



**Tsüklai/February 26, 2024 (Agencies):** 2024 Laureus World Sports Awards atema Erling Haaland, Katarina Johnson-Thompson aser Jude Bellingham nunger nominate süogo.

Manchester City pur team of the year atema tetoktepertem rongnung densema lir aser striker Haaland sportsman of the year atema nominate süogo.

Britain tsür double pentathlon world champion Johnson-Thompson, comeback of the year naroküm atema nominate süogo.

Kasa mapang nung England aser Real Madrid midfielder Bellingham aser Britain nunger 1500m world champion Josh Kerr na breakthrough award atema shimogo.

Arishi kum 23 tain Haaland-i City nungi mezüngbuba asayaba kum asaya 53 nung

goal 52 idaktsü aser Premier League, FA Cup aser Champions League ta tongtibang asayamung asemprongla koka liasü.

Argentina aser Inter Miami forward Lionel Messi shibai taoba kum iba naroküm agizükogo, pa taküma nominate süa lir.

Arishi kum 30 tain Johnson-Thompson-i taoba kum Hungary nung World Championships kokogo.

2019 kum la Achilles ka kanga mejungi yiruba sülen la ojang dang asayatetsü ta bilema liasü. Tokyo 2020 Olympics nung la temola tetsü shisaba sülen wheelchair nung anir tugua liasü.

Kasa mapang nung arishi kum 26 tain Scot Kerr-i taoba kum Budapest nung Jakob Ingebrigtsen ajateta 1500m world title bena liasü.

Maneni arishi kum 20 tain Bellingham, shiba Borussia Dortmund nungi taoba kum Euro million 103 yong Real Madrid-i oa liasü, pa ya team nung tongtibang asayar ka kumogo. Pai tang asaya aliba season nung asaya 29 nung goal 20 idaktsür lir.

British nunger BMX rider Beth Shriever ano action sportsperson award atema nominate süogo. Lai iba award ya 2022 küma agizükogo. Taoba kum lai world title bena liasü.

Team of the year atema Europe indang Ryder Cup-winning team nominate süogo.

Iba award agütsüba sentong ya April 22 nü agitsü.

Journalists aser broadcaster temi nominee tem shimer aser Laureus World Sports Academy, kong asayar tejentem aika densema lir parnoki vote agüja takokertem shimer.

# Sebastian Baez-i Rio ATP Title benogo

**Tsüklai/February 26, 2024 (Agencies):** Deobarnü Rio ATP clay-court asayamung final nung Sebastian Baez-i külem Argentina nunger asayar Mariano Navone kokogo. Iba asayamung akokba densema pai title pongu benogo.

Arishi kum 23 tain Baez-i, world ranking nung jenjang 113 nung alisang Navone 6-2, 6-1 agi kokogo aser pa world ranking nung 21bubai atutsü, koba pa indang career nung tang tashi nung jenjang tajungtiba asütsü.

"Ni hopta tepeyong jangradema asayaogo. Nüburtem, asaya repringertem aser lenla ajak nung ni idaki asayaba ya kidang asayar ama bilemer, koba ni taoba mapanga shiogo," ta Baez-i ashi.

"Pre-season nung idaki hopta ka asayaogo, anungji ni iba tesem aser nüburtem meteta lir aser ni court telung aser tema ajak nung kanga jangradema shilem agir," ta paisa shisem.

Kasa mapang nung Nazzone-i Rio nung iba asayamung masaya tsüngda main tour nung asaya ka danga mekoki liasü, ajisüaka pai semifinal nung



defending champion Cameron Norrie koka final tongteta liasü.

Ajisüak Deobarnü pai junga masayatet aser pa indang serve ana tashi break südakja pa 4-0 agi tesülen aküm aser iba sülen minute 83 nungdang asaya kokdaksü.

"Iba asaya ya kanga tongtiba kechiyong mezüngbuba final asayar asünung na tali nervous asür," ta Baze-i ashi.

"Ni set anaprongla nung kanga junga asaya tenzük aser ibayongji asaya kokogo," ta paisa shisem.

Final asaya mekokaka, Navone tang mezüngbuba top 100-ia 60buba-i atutsü.

**BILEMDANGANG**  
**"Aginüa, temsüa aliba mapang nübur, Tsüngrem tenzükang."**